

VENDIM
Nr. 908, datë 20.11.2019

**PËR PËRCAKTIMIN E AUTORITETIT KONTRAKTOR PËR
PROCEDURËN E PARTNERITETIT PUBLIK PRIVAT, PËR
ZHVILLIMIN E PROJEKTEVE: “NDËRTIMI I KAMPUSIT TË RI TË
UNIVERSITETIT TË TIRANËS”, “NDËRTIMI I GODINËS SË
UNIVERSITETIT TË ARTEVE TË TIRANËS” DHE “NDËRTIMI I
KORPUSIT TË POLICISË SË SHTETIT”**

Në mbështetje të nenit 100 të Kushtetutës dhe të neneve 10, 13, pika 3, 16 e 18, të ligjit nr. 125/2013, “Për koncesionet dhe partneritetin publik privat”, të ndryshuar, me propozimin të ministrit të Arsimit, Sportit dhe Rinisë, të ministrit të Kulturës, të ministrit të Brendshëm dhe të ministrit të Financave dhe Ekonomisë, Këshilli i Ministrave

VENDOSI:

1. Përcaktimin e Bashkisë Tiranë si autoritet kontraktor për të ndërmarrë e për të zhvilluar procedurat për dhënie me koncesion/partneritet publik privat të projekteve: “Ndërtimi i kampusit të ri të Universitetit të Tiranës”, “Ndërtimi i godinës së Universitetit të Arteve të Tiranës” dhe “Ndërtimi i korpusit të Policisë së Shtetit”.

2. Komisioni, i cili do ngrihet në përputhje me parashikimet e ligjit nr. 125/2013, “Për koncesionet dhe partneritetin publik privat”, të ndryshuar, për ndjekjen e procedurave, sipas pikës 1 të këtij vendimi, përbëhet prej 9 (nëntë) anëtarësh, nga të cilët 5 (pesë) anëtarë nga Bashkia Tiranë, 2 (dy) anëtarë nga Agjencia e Trajtimit të Koncesioneve (ATRAKO), 1 (një) anëtar nga Ministria e Arsimit, Sportit dhe Rinisë dhe 1 (një) anëtar nga Ministria e Brendshme.

3. Komisioni i ngritur, sipas pikës 2 të këtij vendimi, për marrjen e opinioneve dhe të ekspertizave të nevojshme, asistohet nga përfaqësues të Universitetit të Tiranës, të Universitetit të Arteve të Tiranës dhe të Ministrisë së Brendshme. Komisioni mund të angazhojë këshilltarë të jashtëm për të siguruar mbështetjen e ekspertëve në përgatitjen e procedurave të koncesionit/partneritetit publik/privat.

4. Ngarkohet Bashkia Tiranë të administrojë procedurat për dhënien me koncesion/PPP, në përputhje me ligjin nr. 125/2013, “Për koncesionet dhe partneritetin publik privat”, të ndryshuar, të projekteve, me objekt: “Ndërtimi i kampusit të ri të Universitetit të Tiranës”, “Ndërtimi i godinës së Universitetit të Arteve të Tiranës” dhe “Ndërtimi i korpusit të Policisë së Shtetit”.

5. Ministria e Financave dhe Ekonomisë vlerëson e miraton paraprakisht projektet sipas këtij vendimi, si dhe çdo ndryshim apo transferim të tyre nga pikëpamja e implikimeve fiskale, individuale apo në grup për shpenzimet buxhetore, deficitin buxhetor, qëndrueshmërinë e borxhit publik dhe detyrimet kontingjente eventuale.

6. Ngarkohen Ministria e Financave dhe Ekonomisë, Ministria e Arsimit, Sportit dhe Rinisë, Ministria e Kulturës, Ministria e Brendshme dhe Bashkia Tiranë për zbatimin e këtij vendimi.

Ky vendim hyn në fuqi pas botimit në Fletoren Zyrtare.

ZËVENDËSKRYEMINISTËR

Erion Braçe